

## O DEL THAJ O BOKHALE ČŠAVE

Sine kaj sine jekh rom thaj jekh romni.  
Nanas len čšavore. But mangenas katar o  
Del te del len due čšavoren. Lengere  
xorates reste dži ke devleskere kana, thaj  
dinjas len o Del duj čšavore. O čšavoro  
somnakune jakhenca, i čšaj rupuvale balen-  
ca. Nakhlo so nakhlo, lengoro dad  
mulo. Palal leste i dajda muli.

Ačšile o čšavore čore.

Nanaj so te xan, bokhale.



I čšaj rovel, pe phralestar mangel maro. So te  
kerel o phral? Lel čik ušnel, ušnel, kerel i čik sar  
maro, thovel andi jag te pekjol. Xohavel pere  
phenja te na rovel. Okotar avel paš o čšave o  
somnal Del. Phučel len:

- So keren athe?
- Bešas, takjovas ki jag - phende o čšave.
- Andi jag so isi tumen? - phučel o Del.
- Ladž si man te vakerav. Thogjom čik te pekjol-te  
xohavav me phenja, kaj si bokhali, te na rovel.
- Ikalen andar i jag so thogen thaj xan! - phenel e  
čšavenge o Del, thaj džal pe dromeste.

Ikalen o čšave andar i jag so thovde, nanas čik, a  
čačuno maro. Thaj xale, xale dži kate lačšes čalile.

*Erlija dialekto andar i Bulgaria*